

Naalakkersuisut Qaortumi GUX-imi timersornermut sammivilimmik pilersitsinissami neqeroorteqarnissamilu pitsaaqutit ajoqutillu nalilersorneqarnerannik imalimmik nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaammi ersersinneqassapput taamatut isummernermi aningaasatigut allaffissornikkullu kingunerisassai. Nassuiaat Inatsisartunut agguanneqareersimassaaq 1. januar 2027 nallertinnagu.

(Inatsisartunut ilaasortaq Karen Marie Kyed Frederiksen, Demokraatit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Siunnersuut pillugu Naalakkersuisut sinnerlugit qujassuteqarusuppunga. Timersornerup ilinniarnertuunngorniarnerrullu ataqatigiissinnissaat inuusuttunut amerlasuunut qulequtaavoq pingaaruteqartoq, inuusuttullu piginnaasatigut timersornikkullu ineriartornerisa pitsaasunik sinaakkuserneqarnissaannik kissaateqarnek Naalakkersuisut isumaqatigaat.

Siunnersuut Nuummi maannakkut periarfissaasumut assinguvoq. Tassani misilittakkat takutippaat timersortartut immikkut piginnaasaqartut ilinniarnerrup timersornerullu ataatsimoortinnissaannut taperserneqarluarsimasut, kisiannili ilinniartut pimoorussinerat soqutiginninnerallu ilinniarnermi tamarmiusumi ulluinnarni ajornartorsiutaasinnaasarpoq. Aamma ilinniartut ilinniakkatigut sammivimmuut ilinniartitsissutinullu aalajangersimasunut pituttorsimasarput, tamannalu ilinniakkamik toqqaaniarnerranni killiliisarluni. Timersorneq aamma ilinniarnertuunngorniarneq ataqatigiissinniarlugit ilinniakkatigut sammivimmuut inuusuttut pituttoraangamik ilinniakkamik taamaatitsinissaminnut qanillisarput. Ilinniaqataajumallutillu siusissukku inuusuttut angerlarsimaffitik qimattariaqartarpaat, tamannalu inuusuttumut annertuumik unammilligassaasinnaavoq.

Aaqqissuussineq inuusuttut ilinniarfissaannik amerlanerusunik kinguneqarnek ajortoq maannakkut misilittakkatta takutippaat, killormulli toqqarsinnaasaat ikilisarput. Taamaattumik maannakkut unammilligassat ilisimariikkagut aaqqissuussap assinganik ilinniarnertuunngorniarninni aallani pilersitsinikkut aaqqinneqarnaviannngillat.

Siunnersuummi Nunatta Kujataani inuusuttut periarfissaannik nukittorsaanissamik siunertaqarnek Naalakkersuisut isumaqatigaat, nutaamilli suleriaasissamik suliaqartoqarnissaa Naalakkersuisut naleqquttuunerutippaat. Ilinniarnertuunngorniarniit sisamaasut akimorlugit ingerlasinnaasumik eqaannerusumillu aaqqissuussinissaq anguniarneqarpoq. Taamatut aaqqissuussinikkut inuusuttut ilinniarnertuunngorniarneq naammassisinnaavaat ilinniartut allat naligalugit aamma qaffasissumik timersuutertik ingerlassinnaajumallugu tapersorneqassallutik. Timersortartut immikkut piginnaasaqartut eqaannerusumik ilinniakkamik toqqaasinnaangornissaat anguniarlugu Naalakkersuisut aaqqiissuteqarumallutik suliumapput, taamatullu ilinniakkatigut timersornikkullu kissaatigineqartut aamma inuusuttut najukkaminnit aallannginnissaat annertunerusumik eqqortissinnaajumallugu.

Tamakku tunngavigalugit allannguutissatut siunnersuut akuersissutigineqaqqullugu Naalakkersuisut saqqummiuppaat:

“Elite Sport Greenland aamma ilinniarnertuunngorniarniit sisamat peqataatillugit inuusuttullu misilittagaat ilaatillugit Naalakkersuisut suleqatigiissitalioqqullugit Inatsisartut

aalajangiiffigisassaattut siunnersuut. Periarfissamik nutaamik nunatsinni ilinniarnertuunngorniarfiit akimorlugit atorneqarsinnaasumik timersortartut immikkut piginnaasaqartut timersuutiminnik pingaarnersiuisinnaanngorlugit ilinniakkatigullu sammivimmik namminneq kissaatigisaminnik toqqaasinnaanngorlugit suleqatigiissitaq innersuussutissanik suliaqassaaq. Innersuussutit tunngavigalugit periarfissaq qanoq piviusunngortinneqarsinnaanersoq kingusinnerpaamik 1. januar 2027 Naalakkersuisut Inatsisartut ilisimatissavaat”.